


# Տնտեսական աճ և արտաքին առևտուր

Ռեսուրսների պաշարի ընդլայնումն ու տեխնոլոգիական առաջընթացը, որոնք տնտեսական աճի հիմնական գործոններն են, անխուսափելիորեն անդրադառնում են երկրի արտաքին առևտրի վրա: Այս բաժնում անդրադառնում ենք արտաքին առևտրի և դրանով միջնորդավորված՝ երկրի բարեկեցության վրա տնտեսական աճի ազդեցությանը՝ առանձնաբար դիտարկելով ինչպես ռեսուրսների կուտակման, այնպես և տեխնոլոգիական առաջընթացի հետևանքները: Վերլուծությունը իրականացվում է ինչպես «փոքր», այնպես և «մեծ» երկրների համար: Նշենք, որ «փոքր» է համարվում այն երկիրը, որի արտաքին առևտրի ծավալները փոքր են այնքան, որ դրանց փոփոխությունը ապրանքների միջազգային հարաբերական գների վրա չի անդրադառնում: Այսինքն՝ փոքր երկրի համար առևտրի պայմանները տրված են: Ի տարբերություն՝ «մեծ» է համարվում այն երկիրը, որի առևտրի ծավալները այնչափ նշանակալի են, որ դրանց փոփոխությունը ներգործում է միջազգային հարաբերական գների վրա:

Իբրև տնտեսական աճի ազդեցության վերլուծման ելակետ դիտարկենք այն համեմատաբար պարզունակ տարբերակը, երբ երկու ապրանքների արտադրական հնարավորության միաչափ ընդլայնման արդյունքում առևտրի ծավալը ընդլայնվում է նույն չափով: Վերջինս անվանվում է *առևտրի չեզոք աճ*:

Գրաֆիկ 45-ում երկիրը սկզբնապես արտադրում է  $Q$  կետում և սպառում է  $C$  կետում: Այնուհետև՝ տնտեսական աճի արդյունքում երկրի արտադրական հնարավորությունների սահմանը տեղաշարժվում է աջ՝ այնպես, որ սկզբնակետից տարված ճառագայթների հետ հաստման կետերում շոշափողների թեքման անկյունը մնում է անփոփոխ: Արդյունքում, արտադրության նոր  $Q^*$  կետում երկու ապրանքների թողարկումը ընդլայնվում է միևնույն համամասնությամբ, ինչ-որ արտադրական հնարավորությունների ընդլայնման համամասնությունն է, այսինքն՝  $OQ/OQ^* = OF/OF^*$ : Արտադրության նման ընդլայնումը անվանենք *արտադրության չեզոք աճ*:

Գրաֆիկ 45: Արտադրության, սպառման և առևտրի չեզոք աճը



Արտադրելով  $Q^*$  կետում՝ երկիրը սպառում է  $C^*$  կետում: Վերջինս գտնվում է սկզբնակետից տարված, սպառման նախկին  $C$  կետով անցնող ճառագայթի վրա: Ընդ որում սպառման նախկին և ներկա կետերում անտարբերության կորերի շոշափողները միմյանց զուգահեռ են: Հետևաբար՝ ապրանքների սպառման ընդլայնման համամասնությունը հավասար է արտադրական հնարավորությունների ընդլայնման համամասնությանը, այսինքն՝  $OC/OC^* = OF/OF^*$ , հետևաբար՝ առկա է *սպառման չեզոք աճ*: Բնականորեն՝ սպառման ընդլայնման համամասնությունը նույնն է, ինչ որ արտադրության ընդլայնման համամասնությունը՝  $OC/OC^* = OQ/OQ^*$ :

Արտադրության ու սպառման չեզոք ընդլայնումների արդյունքում մահուդի արտահանումը և գինու ներմուծումը, կամ որ նույնն է՝ առևտուրը, նույնպես, ընդլայնվում են նույն համամասնությամբ՝  $sC/s^*C^* = sQ/s^*Q^* = OF/OF^*$ , այսինքն՝ առկա է նաև *առևտրի չեզոք աճ*:

### Ռիբչինսկու թեորեմ


Թեորեմում դիտարկվում է տնտեսության ոչ չեզոք աճի ազդեցությունը արտադրության վրա: Այսինքն, երբ ռեսուրսներն ընդլայնվում են անհամաչափ և դրանով պայմանավորված թողարկումը, նույնպես, աճում է ոչ համաչափ: Թեորեմի հեղինակը Թադեուշ Ռիբչինսկին է՝ ծագումով լեհ, անգլիացի տնտեսագետ: Թեորեմը հիմնված է հեղինակի՝ Լոնդոնի տնտեսագիտության դպրոցում գրած թեզի վրա, որի արդյունքները Ռիբչինսկին հրապարակեց մի քանի տարի անց՝ 1955թ-ին:

Թեորեմի ապացուցման համար դարձյալ օգտվենք Էջվորֆ-Բոուլի արկղից: Սկզբնապես առկա աշխատուժի և կապիտալի պաշարները նկարագրվում են  $O_w M O_c N$  արկղով (Գրաֆիկ 46), այսինքն աշխատուժի քանակը կազմում է  $O_w M$ , իսկ կապիտալի քանակը՝  $O_w N$ : Ռեսուրսների գների հարաբերությունը կազմում է  $(w/r)_1$ , գինու արտադրությունում կապիտալ-աշխատուժ օպտիմալ հարաբերությունը տրված է  $O_w E$  ճառագայթով, իսկ մահուդի արտադրությունում կապիտալ-աշխատուժ օպտիմալ հարաբերությունը՝  $O_c E$  ճառագայթով: Հետևաբար՝ արտադրության հավասարակշիռ քանակը նկարագրվում է  $E$ -կետով, ուր գինու թողարկումը կազմում է  $Q_w^1$ , իսկ մահուդի թողարկումը՝  $Q_c^1$ : Նկատենք, որ գինու արտադրությունը աշխատատար է, քանի որ  $O_w E$  ճառագայթի թեքման անկյունը փոքր է արկղի  $O_w O_c$  անկյունագծի թեքման անկյունից, որը արտահայտում է տնտեսությունում միջին կապիտալ-աշխատուժ հարաբերությունը, իսկ մահուդի արտադրությունը կապիտալատար է, քանի որ  $O_c E$  ճառագայթի թեքման անկյունը մեծ է  $O_c O_w$  անկյունագծի թեքման անկյունից:

Այժմ ենթադրենք՝ աշխատուժի պաշարը ընդլայնվում է  $MM^*$  չափով և Էջվորֆ-Բոուլի արղկը կազմում է  $O_w M^* O_c^* N$ : Մեզ հետաքրքրում է, թե ռեսուրսներից մեկի՝ տվյալ դեպքում աշխատուժի պաշարի ընդլայնումը ինչպես է անդրադառնում արտադրության վրա, երբ ապրանքների հարաբերական գինը մնում է անփոփոխ:

Ռեսուրսների հարաբերական գների հավասարեցման թեորեմի ապացուցումից հիշենք, որ ապրանքների հարաբերական գների ու ռեսուրսների հարաբերական գների միջև առկա է

Գրաֆիկ 46:  
Աշխատուժի աճի  
ազդեցությունը  
արտադրության վրա  
Էջվորֆ-Բոուլի արկղում




միարժեք կապ, հետևաբար, երբ ապրանքների հարաբերական գինը չի փոխվում, ապա ռեսուրսների հարաբերական գինը, նույնպես, մնում է անփոփոխ: Իսկ ռեսուրսների հաստատուն հարաբերական գնի դեպքում, քանի որ արտադրության տեխնոլոգիան անփոփոխ է, ապա անփոփոխ են մնում նաև ապրանքների արտադրության ռեսուրսատարությունները: Իսկ քանի որ ռեսուրսների հարաբերական գինը և ռեսուրսատարությունները հաստատուն են, ապա նոր հավասարակշռության կետը հաստատվում է  $E^*$ -ում, որում  $0_c^*E^*$ -ն զուգահեռ է  $0_cE$ -ին, իսկ  $(w/r)_2$ -ը զուգահեռ է  $(w/r)_1$ -ին:

Հավասարակշռության նոր կետում գինու արտադրությունը աճել է, քանի որ  $0_wE^*$ -ը գերազանցում է  $0_wE$ -ին, իսկ մահուդի արտադրությունը կրճատվել է, քանի որ  $0_c^*E^*$ -ը փոքր է  $0_cE$ -ից: Մահուդի արտադրության կրճատման պատճառը նրանում է, որ աշխատատար գինու արտադրության ընդլայնումը պահանջում է նաև որոշ քանակի կապիտալ: Բայց, քանի որ կապիտալի պաշարը չի փոխվել, ապա լրացուցիչ կապիտալի աղբյուր կարող է լինել միայն կապիտալատար ապրանքի արտադրության կրճատումը: Այսինքն՝ կապիտալատար ապրանքի արտադրությունը պետք է կրճատվի, որպեսզի աճի աշխատատար ապրանքի արտադրությունը, երբ տեղի է ունեցել աշխատուժի ռեսուրսի ընդլայնում:

Այսպիսով, Ռիքչինսկու թեորեմը փաստում է՝ երբ *ապրանքների հարաբերական գները հաստատուն են, ապա ռեսուրսներից մեկի պաշարի ընդլայնումը պայմանավորում է այն ապրանքի արտադրության ընդլայնում, որում ինտենսիվորեն է օգտագործվում այդ ռեսուրսը և մյուս ապրանքի արտադրության կրճատում:*

Դիտարկենք Թեորեմի գործողությունը նաև արտադրական հնարավորությունների սահմանի օրինակով: Գրաֆիկ 47-ում  $E$ -ն, այնպես ինչպես Էջվորֆ-Բոուլի արկղում, արտահայտում է արտադրական համակցությունը նախքան աճը՝  $Q_w^1$ ,  $Q_c^1$ : Աշխատուժի պաշարի ընդլայնման հետևանքով արտադրական հնարավորությունների սահմանը ընդլայնվում է՝ ավելի հակված դեպի աշխատատար ապրանքը, որը մեր օրինակում գինին է: Հավասարակշռության նոր  $E^*$  մակարդակում ապրանքների հարաբերական գինը չի փոխվել՝  $(P_c/P_w)_2$ -ը զուգահեռ է

Գրաֆիկ 47: Աշխատուժի աճի ազդեցությունը արտադրության վրա արտադրական հնարավորությունների սահմանի օրինակով




$(P_C/P_W)_1$ -ին, և, սակայն, գինու արտադրությունը ընդլայնվել է, իսկ մահուդինը՝ կրճատվել:  $EE^*$  ուղիղը կոչվում է Ռիբչինսկու ուղիղ և արտահայտում է թողարկման փոփոխությունը, երբ հաստատուն հարաբերական գների դեպքում փոխվում է ռեսուրսներից մեկի պաշարը:

Արտաքին առևտրի վրա ազդեցությունը կախված է նրանից, թե երկիրը սկզբնապես որ ռեսուրսով է առատ: Եթե երկիրը ի սկզբանե առատ էր աշխատուժով, ապա արտահանում էր աշխատատար ապրանքը՝ գինին և ներմուծում էր կապիտալատար ապրանքը՝ մահուդը: Արդյունքում, եթե ներքին պահանջարկը չի փոխվում, ապա աշխատուժի ընդլայնումը կբերի արտահանման աճին, քանի որ, ըստ մեր ենթադրության, երկիրը փոքր է և հետևաբար առկա միջազգային գնով կարող է արտահանել գործնականում անսպառ քանակություն: Ուշագրավ է, որ տեղի կունենա նաև ներմուծման ընդլայնում, քանի որ երկրի կողմից ներմուծվող մահուդի ներքին արտադրությունը կրճատվում է:

Սակայն, եթե երկիրը սկզբնապես առատ էր կապիտալով, ապա գինին ներմուծվող, իսկ մահուդը՝ արտահանվող ապրանքն էր: Այդ դեպքում, երբ տեղի է ունենում աշխատուժի ընդլայնում, բայց այնքան, որ երկրի ռեսուրսառատությունը չի փոխվում, այսինքն՝ երկիրը շարունակում է առատ մնալ կապիտալով, ապա ներմուծման հետ մրցող գինու ներքին արտադրությունը ընդլայնվում է, հետևաբար՝ ներմուծումը կրճատվում է, միննույն ժամանակ, սակայն, կրճատվում է նաև արտահանումը, քանի որ կրճատվել է մահուդի ներքին արտադրությունը:

Ի վերջո, եթե երկիրը սկզբնապես առատ էր կապիտալով և աշխատուժի ընդլայնումը այնքան նշանակալի է, որ երկիրը դառնում է աշխատուժով առատ երկիր, ապա գինի ներմուծելու փոխարեն երկիրը սկսում է այն արտահանել, իսկ մահուդ արտահանելու փոխարեն սկսում է այն ներմուծել: Վերջինս հատկապես բնութագրական է Ճապոնիայի և Նոր արդյունաբերական երկրների համար, որոնք 70-ական և 80-ական թվականներին, լինելով աշխատուժով առատ երկրներ, արտահանում էին աշխատատար ապրանքներ, օրինակ՝ տեքստիլ, սակայն, կապիտալի մեծածավալ ներդրումների շնորհիվ դարձան կապիտալով առատ երկրներ և տեքստիլ արտահանելու փոխարեն սկսեցին այն ներմուծել՝ փոխարենը արտահանելով կապիտալատար ապրանքներ, օրինակ՝ էլեկտրոնիկա:

Գրաֆիկ 48: Սուզման աճը



### Սուզման աճ

Ռիբչինսկու թեորեմում ենթադրվում է, որ ապրանքների հարաբերական գինը անփոփոխ է, այսինքն՝ դիտարկվում է փոքր երկիր: Մեծ երկրի դեպքում, սակայն, արտահանման կամ ներմուծման ծավալների փոփոխությունը կբերի հարաբերական գների փոփոխության և, հետևաբար, ռեսուրսների ընդլայնման ազդեցությունը երկրի բարեկեցության վրա կպայմանավորվի նաև նրանով, թե որքանով են փոխվում առևտրի պայմանները: Ծայրահեղ դեպքում հնարավոր է, որ առևտրի պայմանները փոխվեն այնքան, որ երկրի բարեկեցությունը աճի արդյունքում նվազի և ոչ թե՛ բարելավվի: Այդ դեպքը Բհագվաթին 1955թ-ին անվանեց սուզման աճ, սկզբնական գաղափարը, սակայն, պատկանում է Էջվորֆին և հրապարակվել է 1894թ-ին:

Սուզման աճի գրաֆիկական ներկայացումը պատկերված է Գրաֆիկ 48-ում: Սկզբնապես երկիրը արտադրում է  $E$  կետում և սպառում է  $C$  կետում: Այնուհետև տնտեսական աճի հետևանքով առևտրի ծավալները այնչափ նշանակալի են աճում, որ պայմանավորում են առևտրի պայմանների զգալի փոփոխում, այնպես, որ երկիրը սկսում է արտադրել  $E^*$  կետում և սպառել  $C^*$  կետում: Նկատենք, որ սպառման նոր կետը գտնվում է ավելի ցածր անտարբերության կորի վրա, քան նախկինում: Բարեկեցության նման անկում կարող է տեղի ունենալ, օրինակ, երբ արտահանման և ներմուծման աճի հետևանքով արտահանման գինը նվազում է, իսկ ներմուծման գինը աճում է: